

## Yesu Alikufa kwa Ajili Yetu

*Kwa maana Kristo naye aliteswa mara moja kwa ajili ya dhambi, mwenye haki kwa ajili yao wasio haki, ili atulete kwa Mungu; mwili wake akanawa—1 Petro 3:18.*

**K**uangikwa kwa Yesu katika msalaba wa Kalvari kunatuvutia kwa nguvu, kukitupatia sababu ya kumpenda Mwokozi wetu, na sababu ya kumfanya kuwa wa kwanza na bora katika kila kitu. Tunapaswa kuchukua mahali pa stahili yetu katika toba ya unyenyekevu chini ya msalaba. Tunapomtazama Mwokozi wetu akiteseka sana, Mwana wa Mungu akifa, mwenye haki kwa ajili yao wasio haki, tunaweza kujifunza masomo ya upole na unyenyekevu wa moyo. Mtazame Yeye ambaye kwa neno moja angeyaita majeshi ya malaika ili kumsaidia, mada ya fedheha na kichekesho, ya kulaumiwa na kuchukiwa. Anajitolea Mwenyewe kuwa kafara kwa ajili ya dhambi. Anaposhutumiwa, wala Hatoi vitisho; anaposhitakiwa kwa uongo, hafungui kinywa Chake. Anaomba pale msalabani kwa ajili ya wauaji Wake. Anakufa kwa ajili yao; Analipa gharama isiyo kifani kwa ajili ya kila mmoja wao. Anachukua adhabu ya dhambi za wanadamu bila manung'uniko. Mhanga huyu asiyelalama ni Mwana wa Mungu. Kiti Chake cha enzi ni cha tangu milele, na ufalme Wake hautakuwa na mwisho.

Njoni, ninyi mnaotafuta raha yenu wenyewe katika furaha zilizokatazwa na starehe za dhambi, ninyi ambao mnatawanyika mbali na Kristo, tazameni juu ya msalaba wa Kalvari; mwangalieni mhanga wa kifalme akiteseka mahali penu, na wakati mkiwa na fursa ya kuwa na hekima, na itafuteni chemchemi ya uzima na furaha ya kweli. Njoo, wewe unayelalama na kunung'unika katika taabu ndogo na majaribu machache ambayo lazima ukabiliane nayo katika maisha haya, mtazame Yesu, mwenye kuanzisha na mwenye kuitimiliza imani yako. Akageuka kutoka katika kiti Chake cha kifalme, mamlaka Yake ya juu, na, akiweka kando uungu Wake, akajifunika kwa ubinadamu. Alikataliwa na kudharauliwa kwa ajili yetu; Alikuwa masikini ili kwamba sisi kupitia umasikini Wake tuweze kuwa matajiri. Ukiwa unaangalia kwa macho ya imani mateso ya Kristo, je, unaweza kuyaambia majaribu yako, kisa chako cha huzuni? Unaweza kulea kisasi moyoni mwako wakati unapokumbuka ombi ambalo lilikuja kutoka kwenye midomo iliyokwajuka na kutetemeka ya Yesu kwa ajili ya washitaki Wake, wauaji Wake: "Baba, uwasamehe; kwa kuwa hawajui walitendalo?"

Kuna kazi mbele yetu ya kushinda kiburi na ubatili ambao hutafuta mahali mioyoni mwetu, na kupitia toba na imani ili kujileta katika mazungumzo ya kawaida na matakatifu na Kristo.... Lazima tujikane nafsi, na tupambane dhidi ya kiburi daima. Lazima tufiche nafsi ndani ya Yesu, na tumruhusu aonekane katika tabia na mazungumzo yetu. Wakati tunamwangalia kila wakati Yeye ambaye dhambi zetu zilimchoma na huzuni zetu kumlema, tutapata nguvu ya kuwa kama Yeye. Maisha yetu, mwenendo wetu, utashuhudia jinsi tunavyomthamini sana Mkombozi wetu, na wokovu ambao ametupatia kwa gharama ya namna hiyo Kwake. Amani yetu itakuwa kama mto wakati tunapojifunga wenyewe katika utumwa wa Yesu wa hiari, na furaha (**The Signs of the Times, Machi 17, 1887**).